



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



SKM-i Ato kilonser nem takhangba onük trok agütsüogo

New Zealand nung Covid azüoktsü atema inyakyim tasen benoktsü

VOL. XIX NO. 446 (ADOK 446)

DIMAPUR SANGTENNÜ (TUESDAY) YIMPOKSÜI (NOVEMBER) 23, 2021

₹ 5.00

## Minister Paiwang-i Union Railway Minister den ajurutep



P. Paiwang Konyak-i Union Railway Minister Ashwini Vaishnaw den ajurutepbo noksa nung angur.

Iba senden nung Minister Paiwang-i Union Railway Minister dang Nagaland Express train Dimapur railway station nung tanaben anendaktsütsü atema ayongzük.

Taoba mapang state sorkari Railway Board dang anaben tashi Ledo station nung Nagaland Express anendaktsütsü lemetetba meyipa agütsü mepishiogo saka tang tashi Railway Board nungi telangzüba tajung ka mangu lir ta Paiwang-isa metetdaktüsü.

Idangji Union Minister Ashwini-i iba onük ya pai reprangshimtsü ta nangzük.

Nagaland Express train ya 2011 kum Dimapur aser Guwahati tsüingda senzütsü tenzuka liasü.

Ledo station ya Nagaland nungi kilometer 150 pilar lir ta Nagaland sorkari ashir.

North East Frontier Railway kükob sen teimtiba aazükba station tanabubaji Dimapur station lir aser Dimapur station nungi apusoba passenger train ji 'Nagaland Express' dang liasü ta state sorkarisa metetdaktüsügo.

Talisa, Nagaland nung railway station ka dang aser ibaji Dimapur station lir.

**Dimapur, November 22, 2021 (TYO):** November 22, 2021 nü Transport, Civil Aviation, Railways and Land Resources Minister P. Paiwang Konyak-i Union Railway Minister Ashwini Vaishnaw den ajurutep.

## ANCSU-i tatidang agütsü aliba reprangshidaktüsünür

**Dimapur, November 22, 2021 (TYO):** All Nagaland College Students' Union (ANCSU)-i Nagaland state sorkar aser Nagaland University dang December 3 nungi 17, December tashi Three Year Degree Course tatidang agütsü alibaji online yimya nung agi tajungba ta metetdaktüsügo.

Nagaland state sorkar aser Nagaland University-i COVID-19 wara anema rarayonga arudang kakeshirtem asoshi süoki ia bilemba mapa balala inyaka aruba pelar ta ANCSU-i sangdong ka nung ashi.

December 3 nungi BA/B.SC/ B.COM/BBA/BCA atema Three Year Degree Course tatidang agütsü sentong lir. Alima den külemi Nagaland-ia healthcare aser rongsenketzung maparen tajungba

kümdaktüsü atema inyakba mapang ka lir aser iba ama mapang ka nung college azüngertem lendongi aitsüsa tensa bener madokdaktüsüta, ta parnoki ashi.

Kaketshirtem dang nungi tebilemba asüngdangdang parnokibo online mode nung ang tatidang agidaktüsünüa bilemba shiogo. Ajisüaka, state sorkar aser NU-i tensa jungjunga asadangtsü aser tatidang agiba inyakyim reprangshimtsü mepishir, ta ANCSU-i metetdaktüsü.

NU kükob college tem aser ano autonomous college aser university tem nunga tatidang tiptema agütsü, jungjunga asadangtsü aser mapang shitak nung results sangdongtsü atema state sorkar aser NU-i tetuyuba agütsütsü ayongzük, ta ANCSU-isa ashi.

## COVID-19 Nagaland: 10 dak putet, 6 anep & 1 asü

**Kohima, November 22, 2021 (TYO):** Hombarnü Nagaland nung nisung 10 dak COVID-19 aliba putet, nisung 6 taneptsü angu aser COVID-19 puteta alir ka asü.

"Tanü putetertemji Dimapur nung nisung 9 aser Kohima nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda COVID-19 puteta alir nisung 6 taneptsü angu. Parnokji Dimapur nung 4 aser Kiphire o Mokokchung nung kaka (1) lir" ta paisa ashi.

Nisung 32,060 nungi 30,179 taneptsü nguogo aser ibaji taneptsü angur 94.13% lir, tad r. Kikon-isa ashi.

Tang nisung 128 anepaludar aser parnok rongnung nisung 100 dakbo shirangba yimya kecha mali

ta paisa shisem.

Hombarnü Dimapur nung COVID-19 puteta alir ka asüba züngsema tasür ajak agi 696 kümogo, ta paisa metetdaktüsü.

"Deobar tashi nung nisung 726,001 nem COVID-19 vaccine indang dose 12,57,217 agütsüogo" ta State Immunization Officer Dr Ritu Thurr-i ashi.

Vaccine agirtemji frontline workers 60,976, healthcare workers 15,999, arishi kum 45 ser tempur 205,855 aser arishi kum 18 nungi 44 tsüingda alir 443,171 lir, ta pai ashi.

"Vaccine agirtem rongnung nisung 531,216-i dose anaprong agiogo. Parnokji frontline workers 48,297, healthcare workers 13,476, arishi kum 45 ser tempur 169,212 aser arishi kum 18 nungi 44 tsüingda alir 300,231 lir" ta Dr Thurr-isa metetdaktüsü.

## Congress-i ULBs atema advisory councils metentettsü nenshir

**Kohima, November 22, 2021 (TYO):** Nagaland nung Urban Local Bodies (ULBs) atema state sorkar advisory councils nung nisungtem shimoktsü lemetetba magizük, ta Nagaland Pradesh Congress Committee (NPCC)-i tanü metetdaktüsügo.

"State sorkari November 18 nü iba indang sangdong ka agütsüba sota ayutsüla kechiyong Nagaland Municipal Act 2001 dak sendakba ken o Supreme Court nung metembang lir" ta NPCC president K Therie-i Hombarnü Congress Bhavan nung osangbener dang ashi.

"Iba onük atema State Congress Legal Cell-i Nagaland nung municipal aser town council aliba Deputy Commissioner aser Additional Deputy Commissioner ajak dangi shidi zülutsü lemetetog. State sorkari November 30, 2021 nü advisory council nung nisungtem shimoktsü tuyubaji Municipal Act den meputep anungji iba mapa meinyaki atang ta shidi zülutsü" ta pai metetdaktüsü.

Dimapur, Kohima aser Mokokchung nungi municipal body aseme state sorkar lemetetba magizükba nung Congress-ia pusemer asü koda ta osangbeneri asüngdangdang "municipal bodies atema onok ajak nükjidong aser tamendakdak kasa dang lir" ta Therie-i langzü.

"Naga Mothers' Association (NMA)-i Supreme Court nung tetsür nem 33% lezmükja ULB

elections agütsü indang special leave petition aser Civil Appeal benoka liasü saka ibaji parnokisa 2017 nung meyipa agi" ta NPCC working president Khriedi Theünuo-i ashi.

Ajisüaka, Peoples Union for Civil Liberties-i NMA melenä Supreme Court nung kasa ken o benoka lir aser ibaji ano metembang lir ta paisa metetdaktüsü.

Sorkari Kohima nung dang temolung agütsür:

Tang aliba Nagaland sorkari tashi ajak centralized süogo aser Kohima nung dang temolung agütsür, ta NPCC president Therie-i ashi.

Tesem ka nung dang merangloki tashi decentralize asütsüla. Nagaland nung district tejentiba ana- Tuensang aser Mon dena tanga district tem asoshi sen melemzüktsür" ta pai ashi.

Naga Yimten Tebilemstü:

"Nagaland atema olemtep tembangogo aser joko mapa kuma inyaktüsüba dang anünga lir ta Prime Minister Narendra Modi aser Interlocutor R N Ravi nati shiogo anungji 2022 Manipur assembly elections sülen mapa kuma tenzüktsü onoki imlar" ta Therie-isa ashi.

Nagaland nung Naga yimten tebilemstü atema opposition maliba United Democratic Alliance (UDA) sorkar akümba atema "asenok ajaki telemetetba agidaktüsünür aser MLA tem tashitsü kecha mali saka kechi

lemtetdir ibaji parnoki mapa kuma inyaktüsüba dang lir" ta Therie-isa metetdaktüsü.

"Olemtep agia lemetetba pusema nungitsü melenä MLA temi ano maneni olemtepang ta ashir" ta paisa ashi.

NSCN(IM)-i wako aser temzung atema noktakba atema Therie-isa ashiba agi "Framework Agreement nung sign asüidang ni India sorkar dang NSCN(IM) nem kechi agütsütsü bilema lir ta asüngdang. Idangji Centre-i Manipur nung hill district ajak sixth schedule kükob autonomous council ka kükob dendaktüsütsü ta langzü saka hill district tem longjema mali anungji ibaji meinyaktet."

"Iba sülen NSCN-IM-i wako aser temzung indang jembitsü tenzük saka Societies Registration Act nung wako aser temzung dennür ang register asütsü asü?" ta paisa asüngdang.

"Iba takhangba ya tetezü mali kümogo. NSCN(IM)-i parnoki akhangba onüktem yimjak nung metetdaktüsütsüla. NSCN(IM)-i India sorkar nem 30 point demand agütsüba nung tongtipang onük dena lir mali ta bilemer" ta NPCC president Therie-isa ashi.

"Tetsüba kum 25 tashi olemtepa arur saka tang tashi nung Framework Agreement dak alaka asenoki tanga kulikaket kecha mangu aser Framework Agreement nung onüktem kecha balala mali" ta paisa ashi.

## Hindu Bangladeshi nunger crore 1.9 tashi Assam-i arutsü: Akhil Gogoi

**Guwahati, November 22, 2021 (Agencies):** India Prime Minister-i ashishitep aketba Farm laws asem meyipa agiba osang sangoktsüba sülen Citizenship Amendment Act (CAA) meyipa agütsü takhangba agütsüba tenzükshio.

"CAA anema lungkak aitba kobi melii tenzüktsü aser linük nung aluyimertemi ozüng agendaktüsüba ama nübertemi iba act ya agidaktüsütsüla" ta Sibsagar MLA aser aluyimer lennir Akhil Gogoi-i ashi.

CAA ya mapa kuma tenzükra Hindu Bangladeshi nunger crore

1.9 shi Assam-i arutsü lenmang lir, ta pai ashi.

"Ni tepuokdak alidang Assam nung CAA anema noktakba tanishirtem aser teloktemi lungkak aitba tashimeiti kümdaktüsü. Aluyimertemi masetshii noktakba asenoki nguogo aser iba jagi Farm laws meyipa agiogo saka CAA-bo meyipa magi lir. Tanishirtemi yimya balala ajanga lungkak aitba tashimait kümdaktüsü" ta Akhil Gogoi-isa metetdaktüsü.

"Yimdong nung agütsü melenä play-ground nun gang lungkak aitba sentongtem agi. Iba mapang

tanishirtemi sorkar tsüba liasü ama ni bilemer" ta paisa shisem.

"Asenoki lungkak aitba tenzükshitsü mapang tongogo aser tashi ajunga agi tenzüktsü. Assam nungeri pei takhangba onüktem nung akangakanga noktaktüsüla" ta Akhil-isa ayongzük.

Assam nung CAA ya kanga dang ashishitep aketba onük ka aküm. Iba Act ya mapa kuma inyakra, Bangladesh nungi Hindu nunger aika Assam-i arutsü aser iba ajanga lisopor sobaliba samaa aotsü ta bilemer.

## Manipur nung BJP sorkar tanaben arutsü: Amit Shah

**Imphal, November 22, 2021 (Agencies):** Manipur nung taruba Assembly elections nung BJP-i takok ngua maneni sorkar yimsü asütsü ta Hombarnü Union Home Minister Amit Shah-i ashi.

Kum aika kiralongraba mapa inyakba ajanga Manipur state tia kanga mejungi kümer liasü saka BJP-i tangbo yimjung bener aruogo, ta pai ashi.

2017 kum Chief Minister N. Biren Singh-i anir BJP sorkar akümba sülen Manipur nung mokdangba inyakyim aser tanga meinprongtem anenogo ta Amit Shah-isa metetdaktüsü.

Menden 60 agi akümba Manipur Assembly atema sangküm February-March nung election agütsü sentong lir.

"Manipur nung law & order tajungba kümogo. Taruba Assembly election nung BJP-i tashi ngua sorkar tanaben akümba sülen state talila renloktsü" ta paisa shisem.

Manipur nung Sports University ka lapoktsü, Prime Minister Narendra Modi-i yakta assembly building tasen lapoktsütsü aser state renloktsü atema infrastructure projects aika inyakdar, ta Union Home Minister-isa metetdaktüsü.

1857 revolution aser ano 1891 nung British nunger anema northeast region ajungalen noktakang Manipur-i tongtipang shilem agiogo, ta paisa ashi.

Rani Gaidinliu Tribal Freedom Fighters Museum:

Tanü Amit Shah-i Luangkao yim nung Rani Gaidinliu Tribal Freedom Fighters Museum yanglutsü atema lung azüngtsü.

Luangkao ya Manipur kükob Tamenglong district nung lir.

"Tribal Freedom Fighters museums ya linük kükob tesem balala nung yanglur aser iba ajanga asen loktiliba longjemdaktüsütsü" ta pai ashi.

"India'er nüjiso atema inyakba

mapa nung lisoportemi bendanga agüja inyakba otsü jila nung alirtemi memetet. Iba jagi PM Modi-i state balala nung iba mesükba museums lapoktsü lemetet" ta Amit Shah-i metetdaktüsü.

Sorkari iba museum atema Rs 195 crores lezmüktsü aser iba nungi Rs 110 crore agütsüogo ta paisa shisem.

Gujarat, Jharkhand, Andhra Pradesh, Chhattisgarh, Kerala, Madhya Pradesh, Telangana aser Manipur nung Tribal Freedom Fighters museums lapoktsü.

Manipur nungi nüjiso atema rarartem nem tetushi agüja Centre sorkari Andaman and Nicobar Islands nung aliba Mount Harriet melenä Mount Manipur ta jalokja liasü.

India nüjiso atema raraba mapang Manipur Maharaja Kulchandra Dhawaj Singh aser nüjiso atema rarar nisung 22 tashi Mount Harriet nung puoka ayu.

## Kohima nung International Day for Elimination of Violence against Women amungtsü

**Dimapur, Yimpoksüi/Nov. 22 (TYO):** Nagaland State Commission for Women ajanga Nagaland State Social Welfare Board, State Resource Centre for Women aser Department of Social Welfare den lungjemer November 25, 2021 anepdang 7:00 ako nungi tenzuka International Day for Elimination of Violence against Women amungtsü aser 16 Days of Activism against Gender-Based Violence tenzüksü. Iba sentong ya Old MLA Hostel Junction, Phoolbari nung agitsü.

Yangji sentong tatsüka agiba sülen gari 50 shi dena car campaign ka tenzuka banner aser IEC tem bener PHQ Junction tashi aotsü aser nüburttem nem tetsür anema tim masüba mapa inyakbatem atema awareness agütsütsü.

Iba sülen telok ya tilaka kuma lemsar pei colony bushia aotsü aser yangji tetsürtem kumzuka ayutsüba osang prokshitsü.

2021 küm United Nation indang omen ya "End Violence Against Women Now!" alitsü, koba November 25 (International Day for the Elimination of Violence against Women) nungi December 10 (Human Rights Day) tashi alitsü.

## MENUNGRAA BILEMTETER



**Aso:**  
29.10.1950

**Asü:**  
23.11.2020.

**Late. T. LANUWAPANG KICHU**

Onoki teti meima aliba ozü tsürabur, Lanuwapang Kichu (Chungtiayimsen) akümüli wadang temer Kibuba dangi oadokaka, onoki kodanga na mamateter. Tanü küm ka rentetba anogo onoki na menungraseta bilemteter. Nü mapa tajung, temeim, ajemalu aser taremsük shisatsü, item sempettemji chirnur aser semchi semnurtem madak senmang temoatsü lidakjang ta onoki teti sarasademer.

*- Temeim kinungtsu, jala, semchirtem aser kinungertem.*

## Youth Resources & Sports ajanga metetdaksür

**Dimapur, Yimpoksüi/Nov. 22 (TYO):** Directorate of Youth Resources & Sports ajanga Nagaland nung aliba Tribal Hoho ajanga dang sangdong ka nung ashiba agi, taküm Hornbill Festival 2021 benjongmung nung shilem ka ama Indigenous Games inoka lir.

Anungji Indigenous Games tetoktepba nung shilem agitsü asoshi jelia renemshitsü atema tsinglanglen agüja aliba osang ya sangdonger.

### I Criteria:

1. Traditional Shot Put (Tebur kisüing) - Kin shia nungi nisung kakai shilem agitsü.
2. Stilt Bamboo Walk race (Tebur

kisüing) - Kin shia nungi nisung kakai shilem agitsü. Stilt Bamboos ya shilem agirtemi anepalutsü.

3. Tug of War (Tebur aser tetsür) - Categori shia nisung 8-i (ti) shilem agitsü. Aser knock out yimya nung asayatsü.

II. Tetoktepba atema anogo aser mapang:

Sl. No. 1 & 2 ya December 5 aser 6, 2021 anogotem anüingdang 12:00 ako nungi nikongdang 1:00 ako tashi alitsü. Aser serial No. 3 ya December 7, 2021 anepdang 10:00 ako nungi tenzuka sayatsü aser asaya ya Amphitheater nung alitsü. Takok angur nem senpet agütsütsü.

## Jangpetkong Senso Telongjem Dimapur Hon Jubilee mungogo



**Dimapur, Yimpoksüi/Nov. 22 (TYO):** Jangpetkong Senso Telongjem Dimapur (JSTD) indang Hon Jubilee mung sentong Saku's Mission College, Dimapur indang Auditorium nung November 19, 2021 nü "Twangwang" omen nung ajemdaker munga liasü.

Iba sentong lenir ya Kilentula Jamir aser M. Limasünep Imchen liasü.

Molungyimsen Students' Union, Dimapur ajanga sentong ya lapoktsü aser Rev. Yapang Walling ajanga sentong nung Tsüingrem temoatsü jazüka sarasadem.

JSTD tir Aoyanger Imchen ajanga tarur pela agizükba o jembia aser Dimapur Jangpetkongtsür Telongjem ajanga JSTD anthem tena liasü.

Iba sülen I. Bendangliba, (Retd.) Director, Industries & Commerce, Govt. of Nagaland ajanga tarur ajungshi aser K.T. Wapang, Chief Electrical Inspector (Retd.) ajanga jubilee nungo kakat sayaa liasü aser Samaro teloki

temeja ken ka aten.

Sentong nung Jangpetkong Senso Mungdang tir, Ao Senso Telongjem Dimapur tir aser MLA Moatoshi Longkumer nungertemi jubilee salem lemsatepa liasü.

Iba jubilee sentong nung yimpoksür, Dr. Longrineken, MLA & Advisor, National Highways, Treasuries & Accounts, Government of Nagaland ajanga lokti ayongzükba den külemi Jangpetkong lenmang yanglutsü atema maparen balala inyakyonga aruba nung timtem aser tetsükdaksü ajuruba indang shia liasü. Paisa lokti dang tükong renloktsü atema lungjemer inyaksü ayongzükba liasü.

Iba sentong nung tongti o jembir, Dr. Walunir ajanga 'Twangwang' onük nung jembia liasü.

Pai, tükong nung tesüiba mapang wadang ajak nung twangwang mapang liasü saka tesüiba mapang nung malitsüla, ta ashi.

Jangpetkong nüburttem nükla ulushitsü mapang lir, anungjidang pei kisüing jangratema alitsü masü saka dangara asen dak jenoktsü, ta ashi.

Iba atema lokti tentet balala aser lenirtemi maparen balala animesor inyaksüla aser sempet tajung aliba tükongsanger jangjateta len anidaksütsüla, ta pai ashi.

Jangpetkong nüburttemi bendanga agütsür inyaksüla, aji asünung dang takok aser terenlok alitsü, ta Dr. Walunir-i ashi.

Sentong nung Jubilee Planning Committee convenor, Imtiakum Ponger ajanga Jubilee Planning Committee osang agütsü.

JSTD kübok Academic Excellence Trust ka tentetsü asoshi iba jubilee nung pangzüng ka renema liasü.

Sentong nung Zulu Ozukum ajanga melepzüng o jembia aser Rev. O. Alem ajanga sentong tembanga sarasademba sülen jubilee chiyongba mapang agia liasü.



Western Sumi area nungi Akato Chophi-i aniba NSCN/GPRN tasenba nung tashi ajak agi yaritsü, ta Western Sumi Kukami Hoho ajanga sangdong ka nung ashi. Ajaki Naga nüburttem asoshi rarar asünung telok kata anema masü, ta Hoho ajanga ashi.

## Nationalist Democratic Progressive Party (NDPP)

*Facta non Verba*

## 4<sup>th</sup> General Convention



23<sup>rd</sup> November 2021 • 11:00 A.M.  
NDPP Office Kohima Nagaland



10:45 am - Flag Hoisting : President, NDPP  
10:50 am - Formal Inauguration

## ORDER of PROGRAMME

### CHAIRPERSON

**Mr. Alemtemshi Jamir**

*Working President & Convenor, Organising Committee*

### OPENING REMARKS OBITUARY REFERENCES

**Chairperson**

### INVOCATION PRAYER

**Rev. Yamyap Konyak**

*State Chaplain*

### WELCOME ADDRESS

**Mr. A. Nyamnyei Konyak**

*Working President*

### PRESIDENTIAL ADDRESS

**Mr. Chingwang Konyak**

*President*

### SHORT SPEECHES

**Mr. G. Kaito Aye**

*Hon'ble Minister*

**Mr. Sharingain Longkumer**

*Hon'ble Speaker*

**Mr. Mhathung Yanthan**

*Hon'ble Advisor*

**Mr. Tokheho Yephthomi**

*Hon'ble MP (Lok Sabha)*

### REPORTS

**Mrs. Vikali A. Zhimomi**

*President, Women Organisation*

**Mr. Kelhouneizo Yhome**

*President, Youth Organisation*

### SECRETARIAL REPORT

**Mr. Abu Metha**

*Secretary General*

### SPEECH

**Mr. Neiphu Rio**

*Hon'ble Chief Minister*

### ADOPTION OF RESOLUTION

**Mr. Nuzota Swuro**

*Working President & Convenor, Resolution Committee*

### REPORT OF THE ELECTION COMMITTEE

**Mr. H. Chuba Chang**

*Senior Vice President & Hon'ble MLA*

### FELICITATION

**VOTE OF THANKS**

**Mr. Charlie Sekhose**

*Senior Vice President & Convenor, Reception Committee*

## Lunch

### RECORDERS

**Mr. T. L. Merry**

*General Secretary*

**Mr. David Neikha**

*Secretary, Media & Communication Committee*


# Aizawl nung kaketshir 80 dak Covid-19 putet



**Aizawl, November 22, 2021 (Agencies):** Taoba ghonda 24 nung Aizawl nung nija school asem indang boarders aser kaketshir 80 densema nisung 212 dak novel coronavirus tashidak putet, ta Hombarnü ketdangsür sangdong ajanga metetdaksü. Deobar aonung Aizawl district nung nisung ana iba tesashi wara agi asü. State nung

iba tashidak agi asür nisung 479 shi kumogo, ta Mizoram information & public relations department-i ashi. Sample 1,098 nungi nisung 212 dak tashidak tasen putet asünung, State nung positivity rate (single day) shilem 19.31 tuogo, ta parnoki ashi. Deobarnü Mizoram nung nisung 509 shi taneptsü anguba densema Mizoram nung Covid-

19 wara nungi taneptsü angur nisung 1,26,672 shi kumogo. Tashidak tasen puteter rongnung (212) Aizawl district nungi 149, Champhai district (24), Khawzawl district (14), Lunglei district (10), Mamit district (6), Serchhip district (4), Kolasib district (3) aser Lawnglai district nungi 2 asütsü. Tang Mizoram nung nisung 4746 anepladar. State nung COVID-19 atema sample lakh 13.99 shi tendangogo, ta State health department-ia ashi. Honibar tashi nung nisung lakh 7.10 dak tema Covid-19 vaccine agütsüogo. Item rongnung nisung lakh 5.46 dak temai vaccine dose anaprongla agiogo.



## Prof. N.S. Ramaswamy Pre-doctoral Fellowship Programme at IIM Bangalore

IIM Bangalore invites applications for the Prof. N. S. Ramaswamy Pre-doctoral Fellowship Programme (Fifth Batch). Applicants must belong to one or more of the following categories: SC, ST, NC-OBC; Religious minorities; Persons with Disabilities (as defined by Government of India); Women and gender-minorities; Persons with primary and secondary schooling from vernacular medium of instruction, rural schools, or government schools. The one-year apprenticeship programme provides individuals interested in an academic career with valuable training and experience before they apply to doctoral programmes in business and related fields. Fellows will receive a monthly stipend of INR 30,000 and a house rent allowance of INR 15,000.

### ADMISSIONS 2022



Join the **ADMISSIONS WEBINAR on Friday, 26 November 2021 at 5 pm IST**  
Register to attend: <http://iimberpsrv.iimb.ernet.in/prod/szkpdoc.sfshow>

For information on the eligibility criteria, selection process, financial support and how to apply, please visit <https://www.iimb.ac.in/programmes/nsrpredoc>  
**Applications due by December 31, 2021 (5:00 pm IST)**  
For queries: [predoc@iimb.ac.in](mailto:predoc@iimb.ac.in) / [marketing@iimb.ac.in](mailto:marketing@iimb.ac.in)

# THIRD NAGALAND FILM FESTIVAL

## HORNBILL EDITION

**03-05 NOV 2021 10:00 AM-05:00 PM**

### CAPITAL CONVENTION CENTRE, KOHIMA

SCREENING

NATIONAL AWARD WINNING FILMS

An Engineered Dream Director : Hemant Gaba | Crossings Bridges Director : Sange DorjeeThongdok | Iewduh Director : Pradip Kurbah

INDIA'S OFFICIAL ENTRY TO THE OSCARS Janani's Juliet Director : Pankaj Rishi kumar

ISRAEL'S OFFICIAL ENTRY TO THE OSCARS Bethlehem Director : Yuval Adler

OPENING FILM Angh Director :Theja Rio

CLOSING FILM Semkhor Director : Aimee Baruah

MASTERCLASSES "Cinema Appreciation" | "Independent Filmmaking" | "Film Tourism"

WORKSHOPS "Digital Photography" | "Screen Writing"

FREE ENTRY

## Cachar nung nisung ka apu

**Guwahati, November 22, 2021 (Agencies):** O mejembiteter/temeli tatsük (autistic) arishi kum 15 tetsür ka dak shi nung medem ama temolung melema bilemba atema Assam kübok Cachar district nung arishi kum 35 tain tebur ka puogo.

Hokolbar anüngdang tetsür la tsürabur mapai orr aser kidang la kisüng aliba mapang iba ya atalok. Lar tsürabur anaprongla ayangertem lir aser parnok ya Lakhipur Legislative Assembly constituency kübok Ledia tea garden nung alir. Pua alisang ya kasa tesem nungi lir.

Hokolbar nikongdang tetsür la tebu aser tetsü kidangi shilangba mapang la jeba aliba ngua tebu yagi police dang osang agütsü

"La tetsüi (grandmother) la ajebba anentsü asoshi mesüsüka liasü, saka onoki la timtem angatetadok. Lai o mejembiteter saka onoki la tebilemba angatetter. Lai sayuba yimya ajanga la dak tashiyim agi shi nung medema liasü ta onoki metetadok. Onoki la dang asüngdangba mapang iba mapa tamajung inyaksang onoki jangjatet aser police station nung tashishiba ka benok," ta tebu ashi.

"Police dangi aotsü asoshi kanga bilemdanger ang telemtetba agi kechiba süra iba jagi la tekolok nung ano timtem tali agütsütsü akok, saka iba ama mapa tamajung inyaker sülen nisungba dak kecha mesüi metoktsütsü ta bilem. Onoki pa nem ozüing agi melaba ama temerenshi tapet agütsüdaktsüner," ta tetsüi ashi.

"Tetsür la tebu ken o benokba dak sendakba nung onoki iba nisung puogo. Hokolbarnü pai tetsür la dak tim masüba mapa inyakba sülen jena oadok. Honibar anepdang Ledia tea garden kübok ki ka nungi onoki pa pua liasü aser kasa anogo okadak agütsü" ta police ketdangsür kati ashi.

"Tetsür la yagi o mejembiteter aser pua alisang yagi la kisüng alidang la dak tashiyim agi shi medema liasü ta nangzük. Tetsür la aneplautsü atema Silchar Medical College and Hospital-i la anir ao. SMCH nungi onoki report tem bendenogo aser la temang tajungba kümer sülen onoki la danga asüngdangyatsü," ta Joypur Police Outpost Officer in-charge, Manir Uddin-ia metetdaksü

Maneni, Court tetuyuba ama, pua alisang ya Silchar Central Jail nung puoka lir. Iba dak sendakba nung Police-i maneni bushi süngdangtsü aser asüngdangyatsü, ta Manir-isa ashi.

## Germany nung refugee ka yariba atema pastor dang senchi achi



Pastor Rev. Stefan Schörk

**November 22, 2021:** Germany nung United Methodist Arogo nung pastor kati Iran nung refugee ka Tenla kidang jenokdaksüba atema senchi Euro sen 1,500 achi.

Germany kübok Bavaria state nung aliba Arogotem Rev. Stefan Schörk-i repranger.

November 8, 2021 nü Bayreuth District Court-i pa küm ana mita repringtsü obendang agütsüba den külemi senchi Euro sen (dollar sen 1,700) achi. Pastor-i iba obendang anema temepishiba agütsüba tebilemba lir.

Interview ka nung jembidang pastor Schörk-i, lanur Iran nungersangi rongdak tejenokdak nungdaka liasü, ta metetdaksü.

Taküm January ita nung Schörk-i Iran nungbaji Pegnitz nung aliba Tenla ki ka nung jenokdakja liasü. Iba tesem ya Nuremberg nungi mile 35 pilar lir.

Iran nungbaji Greece-i yoktsü sentong liasü; pa Greece-i yok asübo pa Germany nung par kibong züngsemtem den pilatsü liasü.

Schörk-i ozüng alema bendanger refugee ka jenokdaksüogo; Germany nung bendanger ka jenokdaksütsü atema sorkari dang temelaba agütsütsü akok, ta shia court-i pa anema obendang agütsü.

Pastor Schörk-i, "Kodang ni nisung ka timtem nung aliba repringtetdir ni temeim mapa sayutsüsa akümer," ta metetdaksü.

"Ni amangba yimsü tesayuba nung ni alitsü meranger. Tsükchir aser kiyonger dang temeim sayutsü atema ni Amongnü shia sayutsünger. Anungji ni jembiba ama ni mapa agia sayutsü nungdak," ta paisa ashi.

Germany nung Arogo lenirtemi refugee tem jenokdaksüba ken o ya tang

mezüng ataloker masü, kechiyong Arogo lenirtemi Tenla kidang jenokdaksüba dak sendakba nung ken o aika benoka lir.

Taküm küm tetenzüklen-a Germany nung aliba Oberzell monastery nungi nun, Juliana Seelmann-ia Nigeria tsür ana jenokdaksüba atema la dang senchi chia liasü.

Osang angazükba agi, 2018 küm January nungi March ita tsüngda Germany nungi bendanger 500 jungnüa mindoktsü aliba Arogotemi nokdanga liasü. Ajisüaka 2019 küm nungbo ketdangsertemi Arogotemi bendanger jenokdaksütsü mepishiba magizüker.

Germany ketdangsertemi, ozüng alema bendanger jenokdaksütsü atema Arogo dak tashi mali aser bendanger mindoktsü tuyuba nung Arogotemi tiyongtsü aita inyaktsü menüngdak, ta metetdaksüogo.

## Haiti linük nung puer aoba missionary 17 nungi anabo chiokogo

**Yimpoksu/November 22, 2021:** Ita ka tejaklen Haiti linük nung prangpong amer telok kati Canada nung missionary ka den America nung missionary 16 puer oa liasü, saka parnok rongnung anabo chiokogo, aser tenaprong junga lir, ta Amongnü (November 21) Christian Aid Ministries (CAM)-i parnok indang website ajanga metetdaksü.

Tena anogo 37 tashi pua ayuba sülen chiok.

Christian Aid Ministries (CAM)-isa, "Tang chiokba missionary ana tenüng mesüra tang tena kong aliar, iba osangji onoki agütsütsü makok," ta metetdaksü.

CAM-i, "Tena chiokba atema pelar, ajisüaka tanüngba missionary 15 bo tang tashi pua lir, anungji maneni parnok atema sarasademjang," ta mepishia metetdaksü.

Haiti nung Khristantem, Arogo lenirtem aser America nung missionary temi tang

pua alirtem chioktsü atema lenmang balala lemsatepa liasü.

Pua alirtem kinünger kati, "Kibuba, onok melungjangi ayimdener, iba ya mapang kobika alitsü?. Iba ama tensa ka nung onoki taochi aser tasütait tanela nungdaker. Khrista nung temang ka ama nisung aikati sarasademtsür, Lai tekong lemsateper aser onok tasü itdaksür. Iba ya longjemer lumia sarasademba anogotem lir," ta metetdaksü.

October ita tomten Haiti nung Christian Aid Ministry nung inyaker missionary temi orphanage ka semdangba sülen meyipa aoba mapang nung Ganthier nung 400 Mawozo Gang-i parnok apu. Iba tesem nungji mapang shia Mawozata teloki rakzükkrakter, gari auyar aser nisung puer aoer.

Taküm July ita nung Haiti Tir, Jovenel Moise tepsetba aser August ita nung menoknok

lendong atalokba sülen nungi linük nung tensa kanga mejungi kümogo. 400 Mawozo telok yagi akhidang nungi tamanger teloktem anema inyaker.

Taküm April ita nunga Haiti nung Khristan putir pongu aser nun ana puer ao aser September ita nunga deacon ka tepset aser pa kinüngtsü puer oa liasü.

ICC Tir, Jeff King-i, "Tawa Khristantem puer aoba atema onok mepelar. Onoki parnok den parnok kibongtem atema sarasademtsüdar. Taküm Haiti nung tayongzükba jenti ajurur aser item rongnung Arogo aser ministry anema inyakba densema lir. Linük aika nung ministry mapa inyaker staff tem puer aoba kanga bulua ataloker aser US kidanger linük Haiti nunga item ama tatalokba osang angashia onok mepelar. Onoki US ketdangsertemi tang iba tebilemstü onük atema inyaktsü mepishir," ta metetdaksü.

## ANOGO ABEN TSÜNGREM DEN

## Arung aser ajiang

*Aser parnoki pa dang ashi, Rabi... pai parnok dang ashi, Arung, aser nenoki angutsü. Anungji parnok aru aser Pa kechi nung ali angu aser panüji parnok Pa den ali. Yohan 1:38b-39*

Asenok ajak dangi Khristan aini aoba otsü dang mejembitsü mapang ka arutsü. Iba indang dang jembiba jagi meperir. Asenoki aotsü apusotsüla! Khristan taküm nung sendakba indang asenoki ghonda aika agia jembitsü akok, saka asenoki shidakba Khrista sülen anidaksü mapusora mapang intoka Khristan taküm nung sendakba indang dang jembiba jagi kecha masütsü!

Putu aika, Messia arutsü shisadanga liasü aser Israel kin ajanga shin. Yihuda nung rongnung Messia mapa yimya indang jembiba dang nungi tanga onük tali mejembi alitsü. Andiriai Yohan Baptitsüba nungi Messia arutsü indang angashi. Tang aoksa Pa ngunüa aliba nisung den tejak o tejak na chitepa angu! Andiriai asüngdangnüa aliba asüngdangtsü Pa mulung dangi aru. Andria den theological topic jembitsü melen Yisui meyipa aotsü tenzük. Andiriai asüngdangbaji O kisung agi melangzütsü, saka len jajaba ajanga.

Khristan yimsüji angatetsü asoshi renema yuja aliba ka masü. Ibai nübu ka sülen anidakba lir. Yisui den jajadang Andiriai Yisui shiranger anebtsüba, Tsüngremer shisatsü sayuba aser Tsüngrem ain sayuba Andiriai angu. Andiriai Tsüngrem indang dang angazük masü shidakba nung Pai Pa metetta aküm! Lemjem nung na ne Kibur den noktaksü mapang arutsü. Tasüngdangba ajak kazüdüng nungi, Yisui ne dang ashi, "Ne tsüngsem semokang, leman jagi atokang aser Kü sülen anidakang." Na anogo shia Yisui den jajadang, Yisui ne tasüngdangbatem langzütsü aser nai asüngdangtsü metetta aliba dang nungi timba nai angutsü.

## Egypt nung aliba school ka nung Khristan kaketshirtem dak azük

**November 22, 2021:** Egypt azüktsü ajungshia liasü.

kübok Minya Governorate Egypt nung nütsüng shilem nung aliba school ka nung 10 shi Coptic Khristantem lir, headmaster-i Kangki zük aser parnokji mezüngbuba Aso mesüra Kangki keta aliba (first century) nung Khristan kisen inoktsü memelar, ta yimsü agizükertem dak nungi tetuyuba sülen tesayurtem jakzükba lir.

Open Doors USA-i ashiba agi, tang alima nung

Egypt nung Coptic Khristantem tamajungba Khristantem pei tekanük nung reshikangshiba linük 20 Kangki teptsü ateper, Kangki rongnung Egypt densema lir.

Egypt nung Khristantem tamajungba reshikangshiba tesemtem rongnung Minya school nung headmaster-i Governate densema lir; Egypt Khristan kaketshirtem ajak dang sorkari linük nung Khristantem ajungba indang jembir, ajisüaka Khristantem anema inyakba ta International Christian atemabo kecha meinyaker, Concern (ICC)-i metetdaksü. ibayongji talisa Upper Egypt nung Khristantem anema

Kangki keta aliba kisen inyakba kanga bulua ataloker. mesüra azük agizüktsü Egypt nung Arogotemi memelung, ibayongji Tenla ki tasen asütsü aser tesayurtemi parnok dak azük. Khristan melungtet teloktemi

November ita tetenzüklena lokti tenzükba mapa balala Khristan kaketshirtem kati Kangki inyaktsü tebilemba liaka azük azükba atema tesayur tenokdangba aika aliba ajanga kati pa dak azük aser meinyakteter, ta Open Doors-kaketshirtem danga pa dak isa metetdaksü.



## TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜI (NOVEMBER) 23, 2021

### ULBs tentettsü tasak kümogo

**N**agaland nung town tuluba asem, Dimapur, Kohima aser Mokochung nung town committee liasüba jenjang nungi Municipal council jenjangi atuba ya memeshidang tain jilu ajizüka benshiba ama, asenok atema mapang matongdang yongi yimten jenjang tulubaka aginüa awashiba agi tang tashi mapa kuma moutetter asü ta bilemer. Tang ya Nagaland nung Municipal council asem denji town council 36 lir aser item ajak nungji council tenteta mali, anungji government ketdangsertemi tang Municipal aser town council mapatem anepalur. Atangji, iba jagi yimti ajak nung ketdangsertemi ayimjema meinyaktetba tesem aika angur. Tanga tashitemetet aser rongsen akaba tsütsüji yutsür, yimti yimdongtem merüka ayuba mapa nung danga, Nagaland ya linük nung mezüng jenjang nung alitsüla, saka temerüktiba yimtitem rongnung masü saka memerüktiba yimtitem rongnungang densema lir. Iba kuli kisüng jagi Municipal aser town council-tem ya kanga junga kümsetter, tangaria junger ta asütsüsa, pei yimti topur junga yangertsü rongdak nungdakba mapa agi sayur. Nagaland municipal aser town council ya yimti nung telidak purtem shimteta anepaludaktsütsü melen, government nungi administrator mashi ka yoka repringdaksüba bendanger ka nem asen yim repringdaksür amai lir. Aiben Municipal aser Town Council administrator-ji iba yimti nung kiojen aliba nisung masü saka tanga tesem nung alir asür, anungji koba mepu aser kiyong nung kechi ali aser kechi nungdaker, itemji mejangjadang oa adoker aser ano administrator tasen ka arur ta bendanger agi bendanger ka melentepa municipal aser town council yimtitem repringba ajanga, aikati, pei meyong amai bilema anepalu mesütetba timtem angur. Ajisüaka, ULBs shitak tenteta moutet tashibo government ketdangsertem nensa repringdakja atatsüsa akümer. Government asoshia kechianga mashi, nübortemi memulungba agi ULBs election-a magitet süidaksüogo aser ano tang election magii shimdi asünung ajia memulunger ta kodamasüba jenjang ka nung lir. Atangji, iba timtemji nübortem dang atongsü mali, saka tamakokji government tamakok aser government tashimait asütsü. Yimtak yimtsüng nunga putu tatar menden nung lemtetba ozüng ka mapa kuma meinyaktetra, putu mendenji kecha nungdak maka akümer. Iba kasaji, state ka nung tatar senden nung latetba ozüng ka mapa kuma meinyaktetra iba tatar sendenja menügdaker. Iba ama yimten jenjang nungji tanü asenok lir. Ibai, talisa, yimsüsürtem asoshi kanga süoki ia bilemdangtsüba onük ka lir. Joko, asenoki municipal aser town council akümtsü atema melatet masü latetadoker asünungji, asenoka asenoki mulungba nung masü saka linük ozüng kübok tanga yimtitem nung aliba municipal aser town council-tem den liromedema aotsüsa akümer, kechiyong asenok ajak India kübok, anungji kasa senso aser kasa ozüng agi ajak nem kasasa temeten aser maangka agütsür aser tazüoka kasa ozüng kübok azüoker. Atangji, Nagaland asoshi linük temzüng nung arla 371 A nung sobaliba aser ali dak aketba rongsen ajak Naga nung meyong ka temeten agüja lir. Tetezü, Naga nung sobaliba, tamangba yimsü aser ali dak aketba rongsentem nung center ozüng agi mekongshitsü. Ibayongji dang, tang tashi Naga nung sobaliba aser alushi wazüka lir. Ajisüaka, yangi tangatetba kaji, linük temzüng arla 371 yagi Nagaland nung 'urban tesemtem' masü saka rural, yimtak yimtsüngtem indang ashir, anungji town nung akaba ali madakjibo government kibur asütsüla ta Municipal ozüng atsünga angatettertemi ashir. Iba jagi nübortemi anemer aser iba dak aketba arlaji memetongshi tashi ULBs election magidaktsütsü aser ULBs nung züngsemtem teshima meshimdaktsütsü ta nokdaker. Tanabuba tetsükdaktsüji, tetsürtem nem 33% menden shiteta yutsütsüba ya lir. Ano, nübortemi ibajisa memelungba aser ibaji medeni akümba ULBs-ji centeri magizüksü. Item tebilemstütem akoktsü atema government-i Nagaland nung lokti tentet tongtibangtem jaoka shisalemsatepba sentongtem agiogo, ajisüaka tebilemstü koktettsüsa shisa tasen ka mengutet südi. Joko, tangbo government mapaji nübortem sentepdaksür, parnok dang koma inyakla ta masüngdangi, shisatsü tesadem aser tasen bener nübortem dang yamai inyak nung tajungba asütsü ta tangatetba agütsütsü nungdaker. Tang ajuruba tebilemstü ya akoktsü atema ozüng tasen ka latetba agi masü mesüra metongshiba agia masü, saka nisung mulungjang nung pei lima topur junga yangernüba shisatsü aser tangatetba tajung ka ali nungang akoktsü. Idangji dang asenoka tangar ama asensasa asen yimti merükteta nübortem anepalutsü. Atangji, ULBs yabo state government den mapa lemdanger inyaktsüba yimten lir, anungji nübortem saru (tax) medeniang ULBs moutettsü.

## OLEMSABANG

Yi Majemtsü aser Yi Mayoktsü Tsüngrem Den Tezüngzüktepba Agiba nung Aoer Ajaki Ano Khen Asentenshidi: Iba ya Asen Temang Shi-Azü Ajonga agi Kibuba Meimba lir

~ Tiatoshi Longkümer

Okila: 2015 kum department of health and family welfare (H&FW) ajanga survey report ka World Health Day anogo nung metetdakjaa liasü aser ibaji September 30, 2016 anogo Morung Express nung adok. Iba mapang nung aliba H&FW additional director, Dr. Lima Aküm ajanga ashiba agi, Nagaland nung 57% agi tobacco amshir (moko, Sali, talab, sata aser Rajnekhande etc), aser 40% Alcohol (yi ajemer) amshir. Aser item chidiyongdi ajanga 36% hypertension (high blood pressure) agi khangshir aser 11.6% diabetes tashidak adoker. Aji oda, Dr. Lima-i ashiba agi, mapang metongjai asüba cases-tem (pre-mature deaths) ya noklang nung tir shilembo(80%) asenok achi-ajem mazüokba agi adoker. Anungji, asenok achi-ajem aser lipa-liro yimya tongtipang shilem pezü nung azüoka litet nungbo premature deaths ya kanga tajemba asütsü. Item pezüji:

Controlling Unhealthy diet---chiyongtsü tazüokba makai achi-ajemba anentsü

Stop or reduce Tobacco use -moko-sali achiba nungi pilaa alitsü

Stop or reduce Use of alcohol - yi ajemba anentsü mesüra achemtsü

And improve the Lack of physical activities - temang arakzua exercise agitsü aser mapa meranga inyaktsü.

Ano taküm (2021) October 14, Morung Express front page nung Health department ajangasa, District-wise Govt. hospital nung 2013 - 2018 tsüngda yi ajemba ajanga shirangba aser treatment agiba aser asüba record-tem bendener osang kaket nung adok. Nagaland nung distirct ajak rongnung Mokochung town civil hospital nung teimtiba record-ji lir. Dr. Imkongliba Govt. hospital nung yi agi tashidak adoker treatment agitsü arubaji 956 and tasür 54. Iba sülen Kohima civil hospital(NHAK) nung 935 aser tasüba 54. Aser tasembuba nung Dimapur civil hospital nung 911 treatment agi aser tasüba 88 liasü. Ano private hospital-tem nungi recordji benden nungbo treatment agiba aser tasüra item nungji ang teimba asütsü akok. Ano ka bilemdangtsüba, Kohima aser Dimapur hospital-tem nung treatment agirtem mesüra tasürtemji, Angami aser Sema nung dang masü, shibai metet, asen Aoer-Aotsür anga teimba asütsü ta nibo bilemer. Atangji, government record nungjia aser aseni bilemba nunga Nagaland nung yi tesabutiba ajemertemji asen Ao kin aser yamaji tesasatsüka yi agi tasürtema asen kinsa teimba.

#### Yi Tongpang nung Ao Arogo:

1987-8 nungi tenzüker asen Aoer tamangertemi yi tongpang rara tenzüka 1989 kumbo Aoertemi anir NBCC takhangba nung Nagaland Liquor Total Prohibition Act (NLTP) Nagaland assembly ajanga passed asü. Asen Naga arogo nung Tsüngrem lartem ajak Kohima local ground nung senteper longmia sarasadema yi atakatema enok. Aji oda, asen Aoeri anir dry state takhangba yokba tu tanübo Naga nung rongnung yi jemer teimtibaji Aoer aser yi agi tasür-a asenok teimba kümogo. Ya tesüngmangtsü tesasatsü aser Tsüngrem tsüngdang sentsü tulu lir.

#### Khuli Tejangja Makaba Olatem:

Naga nung Khristan aikati Nagaland dry state declare asüba ajanga yi tamajung bener arua ajemer (spurious liquor) aser iba jagi nisung jenti raksar aser teimba asür, anungji dry state ya endoktsüla ta kanga jembir. Ano NLTP act aliba ajanga state revenue achemer aser state economy khangshir ta asateper. Ajia nisunger ongko ka nungibo shitak-a asütsü akok.

Saka kü tangatetba nungibo, item ajak ya tejangja makaba olulutem lir. Kechi lima nung aser koba yi mesepa ajemba nung arishi atsülanga aliba record lir, nibo mangashidang? Yi ajemba ajanga taküm tajungba akümba aser arishi talangba alibaji kecha lima nunga mali aser malitsü. Ano Naga lima nung yi yokzüka nungi state economy tajungba kuma development mapa aotsüba indangji pungmang nung züngi achiba ya dang lir. Yi dokan nungi sarutetba sen agi Nagaland economy ajungkettsüba tanü asen kin iba jakla-yimya nung dangbo shingai meyimlar.

Asenoki ya meteti, yi majemtsü aser yi ayokba dokan ajak shibangtsüba ozüng ya government den shiti nung nangzüktepba ya tongtipangba masü saka aseni amangba Tsüngrem dang azüngashiba tanela ozüng lir. Aser iba azüngashiba ya yur, ano yi tali ang ajemtsü merangba aser Tsüngrem tenzükeri azüngashiba anema yi miima ayokba aser alia ajembaji, alima ozüng anema inyakba yabo toktsür, taküm aliba Tsüngrem anema inyakba temenen lir. Nai aser ni Nagaland police nungi khen atemabo jenbotettsü akok. Saka shingai Tsüngrem tenük nungi jenpotsü makoktsü. Tanü yi ajemer aika yakta asüba dry state declare asüba ajanga yi tamajung jemer (spurious liquor) asür ta metena kari jembir. Ano kari ashir, yi ajemtsü-majemtsüji, nija nem decision agitsü yujang ta ashir. Saka yi ajemertemji asetkong (islands) balala nungi kija alir senteper ajemer masü. Saka yi meseper shiaji kibong ka nungi adoker aser kesa kibong jagi meyiper. Na kija chidiyongdiaka, khuret aser timtimjibo kibong rangben aser lokti-i abener. Jabaso ka mesüra tebu ka yi jangratema jema senzüdang, kibong nung tanur aser kinungtsürbo nüksü agi atem sünga tetsübutenden nung aliba tia aser jenjang ajiteta, arogo lenirtemi iba yi tongpang tenzü.

#### Yi Tongpang ya Tsüngremer Shisatsü nung Inyakba Mission lir:

Atangji, yi tongpang ayonga ozüng yanglua Tsüngrem den azüngashiba mapa ya shisa maka, mashi malur telok ya khen jangraba nung senteper inyakba mapa masü. Hau, Khristar arogo asüyongjia alima nung dang alirji mabensaba aser metok meberia jenti dang lir. Aser kum 30 tsüngda nung inyakim aser tangatetba aika tajungba melenshia odagi. ABAM kübok lim arogo aikati yi ajemer aser ayokertem, item jakla nungi piladaktsütsü asoshi asalendong tajung jenti inyaktepa asenoki ngudagi, aser kanga tajangzüc lir. Aser ano tarutsü nung yi ajemba aser mesepba nungi koda jenboa alitsü itemji lemsatet yonga aotsü. Aji oda, arogo tenzükertem jenti Tsüngremi tokolok aser shisatsü tabensa agütsür Pa tenzükertem aika lir. Aser item shisa-akar Tsüngrem lartemi alima tia shisadanger Tsüngrem den azüngashiba inyakba missionji Dry state declare asüba ya lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

**OLONG PAITEP # 6005**

1		2				3		4		5
				6						
	7		8							
9					10			11	12	
			13			14	15			
16					17			18		
			19			20				
21		22								23
24										
							25			

<b>TIPILEN</b>		<b>LANGTSUNGLLEN</b>	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. — — tatsü	- (3)
24. Tenüng kasa jatepba	- (7)	12. Tebür kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

**OLONG PAITEP # 6004 TELANGZÜBA**

<b>TIPILEN :</b>		<b>LANGTSUNGLLEN :</b>	
2. Anükalem, 4. Mesak, 5. Apet,		1. Kündang, 2. Ayak, 3. Leptep,	
9. Meimtep, 11. Posü, 12. Patak,		6. Sati, 7. Yiar, 8. Sangküm, 9. Metsük,	
13. Tekettsü.		10. Mazü.	

**Agüja aliba noksa nung meputepi aliba bushiang**



**TANÜBO NAI LANGZÜANG**

Q. Koba institution ajanga 'Swavalamban Challenge Fund (SCF)' lapok?  
 [A] NABARD [B] SIDBI [C] SEBI [D] RBI

—————(Taruba adok nung onoki langzüksü)

**YASHIADOK TELANGZÜBA:** Tele-communication

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Lepsong**  
 (n) akhi tsürabur mapang tasü mang ayutsü atema süng asongba (platform to keep dead body)  
 \* Akhi tsürabur mapangbo lepsong nung tasü mang yur shirepdaktsü.

**Leptet**  
 (adv) nok agi alanger agitetba (cut out by dao)  
 \* Lanurtemi tamburtem nem shijep lepteta agütsü.

**NAI-A YA METETTER MA**

- TAOBA MAPANG NOVEMBER 23 NÜ ATALOKBA KAR:**
- 1700 - Cardinal Francesco Albani, Pope Clemens XI ama shim.
  - 1705 - Nicholas Rowe indang jilushi (play) - "Ulysses" London nung saya.
  - 1904 - St Louis nung III Summer (Modern) Olympic Games shibang.
  - 1909 - Tayimtsü (airplane) yanglutsü atema Wright Brothers-i 'million dollar corporation' tentet.
  - 1923 - USA nung Cecil B. DeMille indang "The Ten Commandments" saya.
  - 1937 - Emile Janson, Belgium premier aküm.
  - 1946 - South Korea indang 'The Workers Party' ngutet.
  - 1960 - Tiros 2 - weather satellite khaketa yok.
  - 1964 - Beatles-i "I Feel Fine" & "She's a Woman" saya.
  - 1970 - US nung George Harrison-i "My Sweet Lord" saya.
  - 1991 - Freddie Mercury (45) asütsü anogo ka (November 24) lia pa dak AIDS tashidak aliba osang jangjatsü.
  - 1996 - Greek tsür Irene Skliva (18)-i 46buba Miss World title angu.
  - 2013 - WBO welterweight title takok angutsü atema Manny Pacquiao-i America nunger Brandon Rios tsükdaktsü.

**SUDOKU # 6046 TELANGZÜBA # 6045**

	5			2		3	8			3	8	2	5	1	6	7	4	9
2				4	8					4	9	7	8	2	3	6	5	1
3	4			9	5	1	6			6	5	1	4	9	7	3	2	8
1	9	2			4	7		3		8	1	3	6	4	2	9	7	5
7		5	2		3			9		9	7	4	1	5	8	2	6	3
		8	3		7	9		6		5	2	6	7	3	9	8	1	4
8		7	4	6		9	3	2		7	3	5	2	8	1	4	9	6
			9		3					2	4	8	9	6	5	1	3	7
							1	7		1	6	9	3	7	4	5	8	2

**OJANG LUTEP # 5602**

- NGSROEN :
- TIJEN :
- AKLIA :
- MJITEI :
- TDANKEG :
- SÜASÜT :
- ISATSSHÜ :
- RAMELI :
- AJOAMK :
- MEAKÜR :

**OJANG LUTEP TELANGZÜBA # 5591**

**TAGINÜRBO JENTI SAKA AJAK AJANGZÜKTSÜ ASOSHI MERANGA INYAKER AIKA MALI**

**TAN HOPTA ATEMA - KOMA SÜLA ?**

Q. Asen lima nung 'Clean Election' indang ya kenyongi mejembi aser meinyak nunga koma süla ?



Gorakhpur, November 22, 2021: Hombarnü Gorakhpur nung BJP National President, J.P. Nadda-i Gita Press semdangba noksa nung angur. Uttar Pradesh nung assembly election agitsü mapang ana nung lia booth level nung party tashi itshidaktsüsü atema pai state semdang.

## India nunger tain crore 11.5-i Covid vaccine agitsü arendaker

**New Delhi, November 22 (Agencies):** Mongin aikati September-October ita nung India nung coronavirus wave tasembuba tenzüksü, ta asadanteter liasü ajisüaka yamaji matalokba den külemi coronavirus wara süngjamba agi vaccine agitsü melunga alir tain crore 4.5-i tangbo vaccine agitsü arendaker, ta survey ka ajanga metetdaksü.

Iba dak alia India nunger tain crore 7.4-i vaccine agitsü khenyongi memelunger, anungji ajak senteperbo tain crore 11.5-i iba vaccine agitsü memelunger.

LocalCircles-i October ita nung iba survey ya agi. LocalCircles-i agiba survey nung

India kübok district 309 nungi nisung 10,189-i telangzüba agüja liasü (shilem 62 tebur aser shilem 38 tetsürtem).

Tang tashi vaccine magir shilem 23-i kobi melii vaccine agitsü melunger, aser vaccine ajungba nung ajemdaker ano shilem 16-ia vaccine agitsü melungtetsüa akok, ta survey ajanga metetdaksü. Iba tetezü, India nunger tain crore 75-ibo mezüngbuba dose agiogo aser ano kobi melii crore 4.37-i vaccine agitsü.

Linük nung senso shilem 15-i vaccine agitsü teblemba mali, shilem 23-i temang nung timtem adoktsüa akok ta bilema vaccine agitsü arendaker, shilem 23-i temang nung timtem

balala aliba agi vaccine magiteter. Tang tashi vaccine magir shilem 61-i vaccine agitsü arendaker.

India nung coronavirus vaccine agitsü arendaker aika liasü, ajisüaka taküm April-May ita nung coronavirus tanaben prokba mapang nung iba tashidak kanga putetba aser shiranger aika asüba agi nisung aikati vaccine agitsü melungteta liasü.

Ita 11 shi tsüngda India nung vaccine dose crore 114 shi agütsüogo aser iba nungjagi dose anaprong agir crore 38.11 aser mezüngbuba dose agir crore 37.45 lir.

Tang India nung vaccine dose crore 25 shi lir.

## SKM-i Ato kilonser nem takhangba onük trok agütsüogo

**New Delhi, Yimpoksüi/ November 21 (Agencies):** Anogo ishika tejaklen Ato kilonser, Narendra Modi-i aluyimba ozüing tasen asemprong agientsü, ta sangdongba sülen Hombarnü Samyukt Kisan Morcha-i yimjak nung shidi ka ajanga Ato kilonser nem takhangba onük trok agütsüogo.

SKM-isa, aluyimertemi akhangba onük ajak magizük tashi aluyimertemi jelia yangluba sentong ajak agitsü, ta metetdaksü.

Aluyimertemisa, Ato kilonseri aluyimba ozüing asemprong agientsü teletet agibaji pelaa agizüker, ajisüaka aluyimba ozüingtemji Parliament nung agientsüla, ta metetdaksü.

Aluyimertemi tamasayongi akhangba ama aluyimertem nem minimum support price (MSP) agütsüsü atema ozüing ka yanglutsü maneni akhanger. Iba dak alia SKM-i maneni senden mena teletetba kar agitsü.

SKM-i shidi ka ajanga Ato kilonser dang akhangba onük trokji yamai lir:

Aluyimertemi alu nungi züsentetba chiyungtsü aser

aonsotsü balala atema sorkari aluyimer ajak nem MSP agütsüsüla aser 'Electricity Amendments Bill, 2020/2021 draft agientsüla.

'Commission for Air Quality Management in the National Capital Region and Adjoining Areas Act, 2021 kübok aluyimertem anema benokba ozüingtem agientsüla aser Lakhimpur Kheri nung rara adokba ken o nung tai tonglokja alisang, Ashish Mishra tebu, Ajay Mishra Union Minister of State for Home menden nungi anentsüsüla aser aputsüla.

Delhi, Haryana, Chandigarh aser Uttar Pradesh densema state balala nung longkak aitba mapang aluyimertem anema benokba ken o ajak agientsüla, aser longkak aitba mapang asür aluyimer 700 kinüngertem nem senotsü densema teyari balala agütsüsüla.

Longkak aitba mapang asür aluyimertem nüngtem nung memorial ka yanglutsü atema Singhu Border nung ali lezmüktsüsüla aser item onük trok nung o lemteptsü atema sorkari SKM den senden amentsüla, ta SKM-i takhangba agütsü.



November 22, 2021 nü Rashtrapati Bhavan, New Delhi nung linük Tir, Ram Nath Kovind-i Rashtriya Rifles nungi Captain Maheshkumar Bhure nem Shaurya Chakra agütsüba noksa nung angur. Tawa Maheshkumar leniba nung sepaitemi kiralongrar commander 6 tepseta liasü.

**AXIS BANK LTD**  
Registered Office: "Trishul", 3rd floor, Opp. Samarsheshwar Temple, New Law Garden, Ellisbridge, Ahmedabad - 380 006  
Circle Office: North East Circle, 3rd floor, Chibberhouse, G. S Road, Guwahati - 781005.

**NOTICE**  
Axis Bank nungi teküboklen agüja alirtemi locker facility agia lir.

Sl. No.	Branch Name	Branch Address	Locker No.	Name of the Locker Hirer(s)	Address	Amount Due	Amount Due From
1	Dimapur	Dimapur, Nagaland, Circular Road, Near City Tower, Dimapur 797 112, Nagaland	2025	MD RIAZ UDDIN	Shiyab Eggs Shop Gs Road Nr Alok bhandar Teashop, Dimapur, Nagaland, India 797112	14683	12-05-2017
2	Kohima	Kohima, Nagaland, Ut Complex, Opp/ Ubc Church, Kohima 797 001, Nagaland	1064	BABU KURIAKOSE	Chandamari Higher Secondary, Kohima, Nagaland, India 797001	33275	12-05-2016

Agüja aliba tenüngtem yagi mapang talangka atema iba Bank nung locker rental tsüsü taa magütsü/locker khen danga melapokdangi aruogo. Iba Bank ajanga parnok dang mapang shia locker rentals agütsüsü/locker facility lapoktsü/ mesüra locker facility shibangtsü asoshi osang agütsüogo, koba parnok ajanga iba notice agizükogo/mesüra iba notice parnok ket matong.

Anungji, tekalen agüja aliba tenüngtemi 13/12/2021 anogo mesüra iba anogo matongdang Bank nem locker rentals indang arrears magütsüra/locker melapokra. Banking Law aser Practice inyakyim agi melaba ama iba Bank-i locker hirer tenüng nung iba locker indang lock lapoktsü aser iba bank nung arrears taa den, sen tetemlok, taa magütsü tashi iba locker nung aliba oset ajak bank nung ayutsü, ta notice tatembuba agütsü.

Tekalen agüja aliba tenüngtemi iba Bank nem sentöh agütsüsü aliba dak sendakba nung parnok nem agüja aliba locker nung senotsü kar danga ngura, item sentöh atema senotsütem agizüka ayutsü asoshi Bank dak temeden lir aser agüja aliba anogo süirbo Bank teinyaktsü shilem tim inyaktsü aser ashishia aru nunga magizüktsü. Locker rentals indang balance dues atema, iba Bank-i locker hirer/sentöh menoktsü atema temzüng agi melaba ama inyaktsü temeden lir.

Date : 23.11.2021  
Place : Guwahati  
Circle BBO Head  
Axis Bank Ltd.  
North East Circle

**GOVERNMENT OF NAGALAND**  
**DIRECTORATE OF TECHNICAL EDUCATION**  
**NAGALAND: KOHIMA**  
**NO. DTE/ESTT-2/NEET/01/2021-22/ Dt. Kohima, the November, 2021.**

**NOTIFICATION**

This is to inform all the candidates concerned who have appeared NEET(UG) 2021 and applied for study of MBBS & Allied courses during 2021 session, that the Merit list of NEET(UG) 2021 in respect of Nagaland has been uploaded in the Department website: [www.dtenagaland.org.in](http://www.dtenagaland.org.in) and on the Notice Board of the undersigned. Candidates are instructed to thoroughly cross check their details provided in the rows such as; Name, Fathers Name, DOB, NEET marks, ST category ranking, course options etc.

In case of any discrepancies, candidates are informed to provide the correct details to the office of the undersigned on or before 26th November, 2021. After which, no correction or changes in any manner shall be entertained.

**(Er. M. NAKRO)**  
**Additional Director & HOD**

Issued by DIPR

**Impur Christian Hospital**  
**ANM School of Nursing**  
Impur: Mokokchung, Nagaland  
(Permitted by State Nursing Council, Nagaland)

**ADVERTISEMENT**

Applications are invited from the unmarried girls for undergoing 2 years FHW/ANM course at the ANM School of Nursing, Impur Christina Hospital, Impur, Mokokchung (Permitted by SNC Nagaland) for the session 2021-2022.

The following particulars are given for information of interested candidates:

1. The session will start from 2021.
2. The last date for receipt of the application is 30.11.2021.
3. Application form will be available from Impur Christian Hospital.
4. Age : 17-25 years (as on 30.11.2021).
5. Qualification : Class 12 passed in any stream.
6. No. of seats : 15.
7. Application forms may be downloaded from <http://impurchristianhospital.org>

**Sd/-**  
**Medical Superintendent**  
**Impur Christian Hospital**

## Pakistan kübok Gwadar nung nüburtemi longkak ait



**Karachi, Yimpoksüi/ November 22 (Agencies):** Pakistan kübok tzüküm nung aliba Gwadar yimti nung nüngdak makaba checkpoint tem amenokba, tajemtsü tzü aser electricity agi anüngba aser ozüing alema ango apuba ajanga nüburtem libaliro amokmerenba anema longkak aitar. China indang multibillion-dollar belt and road projects anema nokdakba nung iba yaa shilem ka lir.

Iba longkak aitba sentong ya Balochistan province kübok Gwadar, Port Road nung Y Chowk tesem nung political party züingsem kar, civil rights activists, angopurtem aser iba yimti nung aliba nüburtem ayongzüika hopta ka shi agidar.

Longkak aiteremi nüngdak makaba check post tem agintsü akhangba den tajemtsü tzü aser electricity teperi agütsütsü, Makran tzüküm nungi ango apuba trawler amenoka aliba tema agintsü aser Panjgur nungi Gwadar tashi Iran den arrtsü lapoktsütsü khanga arudar, ta Jang newspaper sangdong ka ajanga Deobarnü metetdaksü.

'Give rights to Gwadar' rally tekolakba Maulana Hidayat ur Rehman-i, parnok takhangbatem mataloktsü tashi parnok longkak aittsü ta ashiba den sorkari iba tesem nung aliba nüburtem tebilemstü bentettsütsü asoshi süoki ia magir, ta ashi.

Rehman-i taoba mapanga, Gwadar nung aliba nüburtem tebilemstü mebantettsüba atema sorkar aitsüogo.

"Onoki Gwadar indang temeden akhanger, koba yimsüsürtemi aziöker lir aser nüburtem nem parnok temeden magütsür. Angopurtem pei poksüing atsü mekoki kümogo, kechiyong Makran nung trawlers tulu amenoka ango aputsü temelaba agütsüogo," ta pai taoba ita lokti senden ka nung ashi.

Rehman-isa, Gwadar Deep Sea Port yangluaka yimti nung aliba nüburtem mapa mali aser sorkari iba atema kecha minyaker, ta ashi.

"Lisopurtem checkpoint tem nung sota parnok dang ken o ashishiba ya mezüingmeshi inyakyim ka lir," ta pai ashi.

Gwadar nung China nung inyaksangshi ajanga temulung masüba nung iba longkak aiba ya shilem ka lir. Iba yimti nung aliba rongnendak ya USD 60 billion China-Pakistan Economic Corridor project (CPEC) nung shilem ka lir.

India-ia, CPEC benokba anemogo, kechiyong iba lenmang ya Pakistan-occupied Kashmir (PoK) ajanga aoer. Iba project yagi China indang Xinjiang province aser Pakistan kübok Balochistan province nung Gwadar port na sendakteptsü.

Gwadar nung nüburtem senzusenpong security forces tem aziöker aser parnok inyakyim tem ashishir. Iba tesem nung alirtem aikati, pei lima nung parnok ainer ama kümdaktsüogo, ta ashi.

Iba den bendenloksema tzüküm nung ango aputsü atema Chinese trawler tem nem sorkari licences agütsüba ajanga angopurtem timtem nung lir. Angopurtemi amshiba rong tila ya trawlers tulu den tokteptsü tamakoktsü, ibayongji parnok mapa inyakyim makai kümdaktsüogo.

## New Zealand nung Covid azüoktsü atema inyakyim tasen benoktsü

**Wellington, Yimpoksüi/ November 22 (Agencies):** New Zealand nung December 3 nü nungi tenzüka Covid wara aziöktsü atema inyakyim tasen benoktsü. Iba inyakyim benokba sülen linük kübok yimti tulutiba nung tenokdangba agütsür aliba agintsü aser shishilembartem inyaksangshitsü melatsü, ta Ato Kilonser Jacinda Ardern-i Hombarnü ashi.

Auckland teyongtsü ser New Zealand nung Covid-19 Delta variant maziökcteti arudar aser ibayongji Ardern-i linük nungi iba tashidak meshimeshia samatsütsü sentong aliba toktsür iba tashidak ya endemic ka ama agitsü asoshi inyakyim benoktsüsa aküm.

NZ nung yimti tulutiba Auckland anogo 90 dak tema mokdang lir, ajisüaka tenokdangba karbo agintsüogo.

"Delta ya kechai maotsü, saka iba ya aziöktsü atema New Zealand renema lir, kechiyong vaccine agir alir aika lir aser tawa traffic light system aser Vaccine Pass amala inyakyim benokogo," ta Ardern-i ashi.

Inyakyim tasenba kübok Covid-19 tashidak menatepa aoba jenjang aser vaccine agiba jenjang apir tesemtem red, orange mesera green ta lemsatsütsü. Auckland kong tashidak pokteta liasü, iba yimti ya red jenjang nung tenzüksü. Ardern-isa, New Zealand

nung vaccine agitsü temsüa alir shilem 83 shi nembo vaccine ajunga agütsüogo aser tanabuba dose agitsü anüngdaka alirtem ajak agira shilem 88 shi akümstü, ta ashi.

Sorkari taoba mapang nüburtem shilem 90 vaccine agiba sülen tenokdangba agintsütsü aser wara aziöktsü atema traffic-light system tasen benoktsü ta sangdonger liasü.

New Zealand nung tang tashi nung nisung 7000 shi dak dang Covid-19 tashidak poteta lir aser iba tashidak agi nisung 39 dang süa lir. Kasa mapang nung New Zealand indang international arrtsü tang tashi shibanga yua lir.

## Taliban-i tetsürtemi shilem agiba show tem nokdang

**Kabul, Yimpoksüi/ November 22 (Agencies):** Afghanistan nung Taliban ketdangsürtemi Deobarnü tamangba yimsü tsütsü tetuyuba tasen ka agütsüogo, aser iba tetuyuba nung linük indang television channel tem dang tetsür actor temi shilem agiba drama aser soap opera tem mesayutsü metetdaksüogo.

Ministry for the Promotion of Virtue and Prevention of Vice-i, Afghan media nem tetuyuba agütsüba nung Taliban-isa, tetsür television journalist tem dang osang agütsüba mapang Islamic hijab asemstü tuyuogo.

Ministry-i, channel tem dang Prophet Mohammed mesera tanga tongtibang nisungtem adokba film mesera sentongtem mesayutsü metetdaksüogo.

Parnoki, Islam aser Afghan nung tangatetba anema yangluba film aser sentongtem nokdangtsü metetdaksü.

"Item ya ozüing masü saka tamangba yimsü tsütsü tetuyubatem lir," ta ministry otongdar Hakif Mohajir-i AFP dang ashi.

Iba tetuyuba tasen ya Deobarnü social media network tem nung ayimsünga prokshio.

Taliban-i tangbo tangatetba tasen nung yimsü asütsü ta shiaka university tem nung tetsürtem sobosolemstü atema

ozüing agüjatokogo aser osangbenertem nem nüjiso agütsütsü nangzükaka Afghan nung osangbener aika merenshia zükogo.

Anüolen aliba linüktem teyari nung küm 20 tashi Afghan media sadem sadema renloka aoba sülen tang TV networks tem nem iba tetuyuba agütsüogo.

2001 küm Taliban atsüngtokba sülen anüolen aliba linüktemi teyar agüja Afghanistan nung television channels aser radio station aika amenoka liasü.

Taoba küm 20 tsüingdang Afghan television channel tem nung "American Idol" mesükba kenten sentong, music video tem den Turkish aser Indian soap opera tem aika sayua liasü.

Taliban-i 1996 nungi 2001 tashi yimsü asüba mapang television, movie aser tanga sentongtem ajak nokdanga liasü.

Iba mapang television reprangba potetertem nem temerenshi agütsü aser parnok indang set tem raksa intoktsü. Video player alia aliba potetra yimjak nung züka merenshia liasü.

Afghanistan nung radio station, Voice of Sharia kija liasü, kong propaganda aser Islamic sentongtem yoka liasü.

## Wisconsin Christmas parade nung gari agi nisung 5 tsükset

**Waukesha, Yimpoksüi/Nov. 22 (Agencies):** US kübok Wisconsin state nung Christmas parade ka alidaki gari ka arua nisung pungo tsükset aser 40 yirutsü, ta City of Waukesha ajanga ashi.

Iba lendong ya Milwaukee nungi anüolen tsütsü kilometre 32 shi pilar Waukesha nung Deobar nikongdang 4:39 ako (par mapang) meta ataloka liasü. Waukesha Mayor Shawn Reilly-i osangbener dang ashiba agi, nüburtem benjongtsü melena lendong ang tuluka ataloka liasü.

"Nübur aika iba parade nung shilem agitsü ao, saka tia maka yiru-yiponga aser temolung ang raksa tembang," ta Reilly-i ashi.

Iba lendong agütsüba atema temolung meleme bilemer ka pua lir aser nisung dak atsükba gari ngutetogo, ta Waukesha Police Chief Dan Thompson-i ashi.

"SUV sentü temerem ka onok downtown nung Christmas parade alidaki aru. Lendong ajururtem rongnung tila tanura kar dena lir," ta Thompson-i osangbener dang shia liasü.

Iba lendong ya kiralongra mapa asü masüar mejangja, saka nisung 72,000 shi aliba jila nungya nüburtem kimai madoktsü totuyuba agüja

alibabo agienogo, ta paisa ashi.

Video ka online nung prokshiba nung SUV sentü temerem ka parade alidak tiyongi tsüoka ai, nisung ter dak tema menünga aoba mapang nüburtem lenmang tezülени jenshi.

Video tanabuba nung police temi iba gari nung injang khaloktsüdang gari ya lenmang nung aliba osettsüset tsükshia ao. CBS den sendaktepa aliba news channel kati Twitter nung iba lendong agütsüba SUV sentü temerem ka ya tsüksar aliba sayu.

Waukesha lendong ya tesempatsü mapa lir aser iba ama mapa inyaker nem tapet temerenshi agütsütsü, ta Attorney General Josh Kaul-i Tweet ka nung ashi.

Waukesha school district board member Corey Montihoni Milwaukee Journal Sentinel dang ashiba agi, par jala nung tsüingsangba telok dak SUV yagi atsük.

Waukesha nung iba lendong ajuruba noksa aser video tem Twitter nung prokshia liasü, kong police indang gari aser ambulance tem yimtung sünga adenshia liasü.

Yirur alirtem ya mozü kidangi ambulance nung kar, police temi kar aser kar kinunger aser medemertemi anir ao, ta ashi.

## Wokha nung NSRLM SHGS atema training ka ayongzük



**Wokha, Yimpoksüi/ November 22, 2021 (TYO):** Department of Fisheries & Aquatic Resources, Government of Nagaland ajanga mapa küma inyakba Gender Budgeting 2020-2021 kübok Hokolbarnü (19.11.2021) Nagaland State Rural Livelihood Mission (NSRLM) Self Help Groups (SHGs) atema 'Fish Product' indang Value Addition nung anogo ka training sentong ayonga agiogo, ta sangdong ajanga metetdaksü.

Iba training atema shisalen sayurji District Fisheries & Aquatic Resources Officer, Wokha, C. Dory Yanthan, District Functional Specialist Daniel Ovung, Area Coordinator Renbeni Patton aser Victor Ovung nung liasü; aser iba training sentong achayangtsü asoshi tanga staff temi yariogo.

Tan training nung Englan Range area nungi training (SFGs) agirtem shima liasü, kechiyong iba tesem nung yimtsüngtem ya Doyang ayong anasa lir aser iba ayong

nung ango jenti lir asünung, parnoki mapang mashi ka nung Doyang nungi ayong ayonga ango tem putettsü akok.

Yimtsüngtem talisa Old & New Riphym yimtsüng, old & New Changsu yimtsüng, Englan aser Yikhum yimtsüng nungi Englan Yingsung Federation (EYF) aser Village Level Organisation (VLO) nungi SHGs balala 13 nungi nisung 28 agi iba training sentong nung shilem agiogo. Iba training nung shilem agirtem dang ango agi chiyongtsü tapu balala talisa Fish- cutlets, Fish- fingers, Fish- pickles aser fish- soup tem yangluba sayua liasü.

District Fisheries & Aquatic Resources Officer, Wokha, C. Dory Yanthan-i, training agirtem dang chiyongtsü merüka amshitsü indang tongtibangtem tongmelang agi metetdaksüba mapang, product tem yangludang sübosülemtsü tim sobur chiyongtsütem renemtsüla/ anepalutsüla ta ashi.

## Meghalaya CM Conrad-i Imphal semdang

**Shillong/Imphal, November 22, 2021 (Agencies):** Hombar anüngdang Meghalaya Chief Minister, Conrad Sangma Imphal tonga aru.

CM Conrad Sangma ya National People's Party (NPP) national president lir.

Taruba Manipur Assembly elections atema NPP pur renemshiba maparen reprangshimtsü nükjidong nung Sangma-i Imphal tonga ao.

"Party züngsem den tarutsü atema asalentong jembishinütsü asoshi anogo ishika Manipur nung amungtsü" ta Imphal airport tonger sülen Sangma-i ashi.

Party nung tekolak aser Meghalaya CM Conrad Sangma agizüktsü asoshi

Imphal airport nung Manipur NPP nung inyaker noklang aika adenshia liasü.

"Imphal airport tonga arudang pelashishia agizükba atema Manipur NPP unit dang pelaba metetdaksür" ta Sangma-i ashi.

Sangma-i direct flight ka nung Shillong nungi Imphal tashi apusoa liasü.

"Shillong nungi Imphal tashi tayimtsü ka nung mezüng senzütsü mapang agi sempettsüba asoshi pelar. Iba route tasen (Shillong nungi Imphal flight) ya tawa tenzüktsü aser senzüsebongertem atema kanga dang anisüngzük," ta Shillong-Imphal IndiGo flight nung amenba sülen Sangma-i ashi.

Iba den külemi ingredient indang quality aser quality product yanglutsü asoshi ingredient balala shitak amshiba indang lai lemsatepa liasü.

Yanthan-isa, pei poksüng atema aazüktsü asoshi iba training sentong nung adentsü aser temulung agüja angazüktsü asoshi training agirtem ayongzük.

Iba training sentong ya NSRLM den longjemer ayongzük aser Department of Fisheries and Aquatic Resources ajanga iba training mapa küma aotsü asoshi achayanger, ta lai shisem.

Tawa tanü, 'processing industry' nung 'value added fish products' ya kanga dang junger. Atangji nunga, iba inyakyim ajanga sen aazüktsü lenmang lapoktsür aser iba den külemi tekübok jenjang nung alir aser tetsür telok atema mapa agütsütsü asoshi shilem tongtibang ka agir. Ibayongji, State indang district ajunga nung talisa kija, zünger mapa mangur, NGOs, tetsür aser SHGs atema State Fishery department ajanga iba ama 'value addition' nung training ayongzük. Iba ama training ajanga 'value added fish products' nung ajemdaker 'small scale enterprise' tenzüktsü asoshi kija aser telok nungittsü, ta kasa sangdong nung shia lir.

## Kiphire nung Sales Day sentong ayongzükaka aka

**Dimapur, Yimpoksüi/ November 22, 2021 (TYO):** Linük tesem ajungalen "Azadi Ka Amrit Mahotsav" benjongba nüngtem nung Kiphire Forest Division, Department of Environment, Forest & Climate Change ajanga Nagaland Forest Management Project (NFMP) kübok SHGs Anatongre pur asoshi anogo ka sales day sentong November 22, 2021 nü Kiphire town nung aliba daily

**MENUNGRA BILEMTETER**  
Asür ALIKALAOZUKUM



**09.09.1979 - 22.11.2021**

Na oadoker joko küm ka renteter.  
Na bo tajungdak lir.  
Anogoshia ne tesüngjem tsüngnep onoki teti bilemteter  
"Kanga menungrar"

**Temeim Kinungbo, Tsürabur, Adianutem & Kinungertem.**

**Küm 10 buba Abensa aruaka kodanga mamateter**  
Lt. Meyisenzung Jamir (Mongsenyimti)



**06/10/1961 - 23/11/2021**

Oba, Nai onok toktsür oakasa tanüa Na onokden ali ama, Nü temeim mapa tajungtem to onoki kodanga mamateter aser teti ozü mulungjang nung alitsü.  
**Temeim Kinunger**

**PELABA LEMSATEPER**

**TASOBA :**  
5th March 1935

**TASÜBA :**  
17th Nov 2021



*"Tsüngrem asen jenokdak aser tashi, timtem nung anasatiba teyarir". T. Ken 46.1*

Asür tsürabur **Takowati Jamir**, kinungertemi shirnokisa ozü asükhu nung alidang aria bilem shisatsü agi lemsatepogo, nenok ajak dang ozü mulung taroktiba nungi pelaba lemsateper.

Tsürabur mapang tatsüka shiranga alidang aser tasüba anogo nungi tanü tashi Arogo, kija kibong, kidong, loktiliba, kiyonger aser medemertem, nenok nübu, rongsen aser sarasadem agi onok den yaritepa asoshi maneni pelar. Onoki nenok ajak dang tsüngtong arua pelaba melemsatepetaka, onok tejashi aser mangyim tia nung alidang yariba asoshi kanga pelar ta iba sangdong ajanga lemsateper.

Tulusang Tsüngremi nenok maneni moajangma, aji ozü sarasadem.  
**Chirnur, semchir aser kinungertem**

market nung ayongzükaka liasü. Kasa anogo Kiphire Forest Division ajanga FDA (NAP) kübok joint forest management committee (JFMC) pur atema training agüja liasü.

Iba training atema JFMC Kiphire village ya shimtet aser parnok nem "Nursery techniques" nung training agüja liasü. Iba training nung follow up ka ama agro-net, polybags, tzü ainba cane aser süngjang lema agüja liasü.

Iba sales day nung SHG aseme shilem agia liasü aser yangji aonsotsü, arem nungi bendenba süngjang-lijang aser teka agi yangluba yongsen mapatem yoka liasü.

## NCA-i Cooch Behar Trophy atema asayar sangdongogo



**Dimapur, Yimpoksüi/ November 22 (TYO):** Nagaland Cricket Association-i Cooch Behar Trophy 2020-21 atema tebur U-19 Cricket Team nung asayartem tenüng sangdongogo.

### Team nung asayartem yamai alitsü:

Yugandhar Singh (Captain), Nripen Rai (Vice-Captain), Mughavi Sumi, Neizekho Rupreo, Odilemba Kichu, Keduowhetuo, Lal Kishan Thakur, Sujal Prasad, Mhalevor Dzeyie, Kavito Lemtur, Raja Swarnkar, Hito K Assumi,

Thejavituo Kire, Thejasilie Savino, Bamyibe Npanme, Kelhousilie Zaputou, Samuel Zaputou, Suzoto Shijoh, Randanbemo Odyuo, Imnatoshi

### Support staff

\* Mowalong Kichu - Team Manager & Physio  
\* Abhijit Chatterjee - Team Coach  
\* Kinchit Nagar - Team S&C Coach

### Asaya mapanglem

\* 1st Match- 29th Nov. - 2nd Dec. 2021 : Nagaland vs Mizoram

\* 2nd Match- 6th - 9th Dec 2021 : Nagaland vs Arunachal Pradesh

\* 3rd match- 13th - 16th Dec. 2021 : Nagaland vs Sikkim

\* 4th Match- 20th - 23rd Dec. 2021 : Nagaland vs Meghalaya

\* 5th Match- 27th - 30th Dec. 2021 : Nagaland vs Manipur

Asayatem ajak Bhubaneshwar nung asayatsü aser Livescore @bccv.tv nung agütsütsü, ta Nagaland Cricket Association, Hon. Secretary Hyunilo Anilo Khing-i sangdong ka ajanga metetdaksü.

## Indo-Nepal International taekwondo championship nung Nagaland team-i shilem agitsü



Hombarnü IG Stadium nung Nagaland taekwondo team aser coach tangokba noksa nung angur.

**Kohima, Yimpoksüi/ November 22 (TYO):** Indo-Nepal International taekwondo championship nung Nagaland Taekwondo team-i shilem agitsü. Iba asayamung ya November 27 aser 28 nü Delhi nung asayatsü.

Taekwondo Sports Academy nungi tebur 20-i iba asayamung nung pewee, sub-junior, cadet, junior aser senior jenjang nung asayatsü.

Nagaland team iba asayamung shilem agitsü atema Mongolbarnü Delhi-i aotsü.

Team coach Visabiu Peseyie-i ashiba agi, COVID-19 wara poktetba ajanga parnok yaküm nungi tang tashi asayamung ka nung danga shilem magiteti arudar. Ajisüaka tenokdangba agütsür alibatam salatsüba sülen academy shilem

agitsü maongka nguogo.

Coach-isa, iba International taekwondo championship nung state tenüng nung oa asayatsü atema Taekwondo Sports academy, IG stadium nem maongka agütsüba atema DYRS Director, Akumla Chubadang kanga pelaba lemsatop.

National school games, sub-junior aser junior National taekwondo championship nung asayartem karibo medal nguatokogo, ta shia pai hopta ishika training kanga junga agiogo aser taruba asayamung nung state nungi asayartemi medal aika akoktsü imla atar, ta ashi.

Kasa mapang nung Department of Youth Resources and Sports Nagaland-i, iba asayamung nung state nungi asayartemi tajungtiba asayatsü

imlaja ataba lemsatopogo.

Team ya coach Visabiu Peseyie, State Taekwondo Coach, Department of Youth Resources and Sports aser Keneingulie Khezhe (team manager) nati anir aotsü.

Pewee category nung Pauninglungbe, Pauziechangbe, P. Athongti nung asayatsü. sub-junior category nung Lensenthong, Manong A. T Konyak, Wongpanthong A, Longshi; cadet category nung Manhei Konyak, Lhuvosayi Vasa, Thongti Thonger, Lungkan Phom, K. Yimkiomong, N. Tenloi Phom, Nnumhei; junior category nung Hinglakpo, Neikhozo Naprantsu, Kiutsu Yimchunger, Haichilung Hegwang aser senior category nung Keyinchigongbe Hega aser Vilabizo Nagi nungeri shilem agitsü.

## 2buba ranking snooker tournament Nov 25 nungi asayatsü

**Kohima, Yimpoksüi/ November 22 (TYO):** Cue Association of Nagaland (CAN)-i ayongzüka 2buba ranking snooker tournament November 25 nungi 27 tashi asayatsü. Iba asayamung ya Q Club-i achaayangtsü.

CAN nung züngoksema aliba club balala nungi asayar 32 iba asayamung nung shilem agitsü.

Asayamung nung shilem agitsü atema registration sen 2000 agitsü.

Asayamung akokba asaya nem senpet sen 20000 aser runners up nem senpet sen 10000 agütsütsü. Semifinal nung tamakok anguba asaya nem senpet sen 5000 aser highest break point award sen 6000 agütsütsü.

## Tamil Nadu-i Syed Mushtaq Ali Trophy kokogo

**Chennai, Yimpoksüi/ November 22 (Agencies):** Hombarnü 2021 Syed Mushtaq Ali Trophy final nung Tamil Nadu-i wicket 4 agi Karnataka kokogo. Asaya akoktsü atema ball tatembangbuba nung run pongu nüngdaka aliba mapang Shahrukh Khan (33\*)-i six ka züka Tamil Nadu nem takok agüja liasü.

Asaya nung Karnataka-i run 151 yanglu aser asaya akoktsü atema Tamil Nadu team-i tatembangbuba over nung run 16 yanglutsü nüngdaka liasü.

Shahrukh batting asüi aitba mapang Tamil Nadu team jenjang mejungi liasü aser asaya akoktsü atema ball 28 nung run 57 nüngdaka liasü. Iba sülen Shahrukh-i ball kanga junga azük tenzük aser par team nem timla agütsü. Telok ana tsüngda kanga toktepa asayaa arur

tatembangbuba ball nung run 5 nüngdaka aliba mapang Shahrukh-i six ka züktoka parnoki asaya akok.

Karnataka team batting amenba mapang Tamil Nadu nungi Left arm spinner R Sai Kishore-i mezüngbuba ball nung Rohan Kadam out sütsü aser iba sülen paisa, Karun Nair aser Manish Pandey na atonga out süja liasü. Karnataka team atema Abhinav Manohar aser Sharath BR nati jenjang yanglushia run 55 yanglu.

Asaya tatemi T Natarajan aser Sandeep Warriar nati ball aonba mapang tatembangbuba over pezü nung run 49 agüja liasü. J Suchith aser Praveen Dubey nati ball 19 nung run 41 yanglua Karnataka atema timla agütsü ajisüaka Shahrukh-i tatembangbuba ball nung six züktokba ajanga parnoki tamakok angu.

## Alexander Zverev-i ATP Finals kokogo

**Yimpoksüi/November 22, 2021 (Agencies):** Germany nung asayar Alexander Zverev-i Deobarnü ATP Finals final asaya nung Russia nung world number two asayar aser defending champion Daniil Medvedev 6-4 6-4 agi koka pa indang career nung iba asayamung tanabenbuba kokogo.

Zverev, shibai Honibarnü semifinal asaya nung world number one Novak Djokovic koka liasü, pa ya season-ending tournament semi aser final nung temaba jenjang nung aliba asayar anaprongla akokba asayar pezübuba kümogo.

Iba takok ya Zverev asoshi mangyangba ama ka liasü, shiba round robin stage nungbo Medvedev-i koka liasü. Tena tesüsa asayaba pongoben prongla Zverev-i mekoki arur tang final nung

pai Medvedev kokogo.

"Asaya aibelen mesüi kanga junga asayatsüba indang jembir. Ni ponguben tashi atonga makokba asayar ka den final asaya kanga junga asayatsü nüngdaka liasü," ta Zverev-i asaya tembangba sülen interview nung ashi.

"Ni iba asaya akokba atema kanga pelar aser iba asaya koker holiday amungtsü pelaa bilemer. Season takok nung tembangtsüji jangrademtsüka aser kasa mapang nung ni ano taruba küm atema tangyongi yongyaa atar," ta paisa ashi.

Arishi küm 24 tain Zverev, shiba final asaya nung break point dak danga majangshi pai taküm final asaya trok asayaba trokprongla kokogo. Pai Tokyo Olympic nung gold aser Madrid o Cincinnati na nung Masters titles ana kokogo.

## **BILEMDANGANG**

**"Pei tia dak dang rangloker taküm alirji tangar memeneper."**